

縣志卷五

經政志

廟祀

禮儀

倉儲

郵政

郵政

兵防

廟祀

治民以事神其諸神道設教意乎然祭不欲數數則煩祭不欲疏疏則怠是不第無以示民且非明禋也壇廟之設爲民祈福州縣皆然茲猶備列者敬恭不忘式禮以思無愆歟祭法云法施於民則祀之以死勤事則祀之以勞定國禦災捍患則祀之非此族也不在祀典志

廟祀

文廟每歲春秋上丁釋奠前三日齋戒演樂前一日省牲

告潔至日知縣行正獻禮教官行分獻禮祝詞奠獻悉準

儀制

樂章

春祭樂章夾鍾爲宮倍應鍾起調
秋祭樂章南呂爲宮仲呂起調

迎

神樂奏昭平之章

大哉孔子

先覺先知

與天地參

萬世之師

祥徵麟紱

韻答金絲

日月旣揭

乾坤清夷

初獻樂奏宣平之章

予懷明德

玉振金聲

生民未有

展也大成

俎豆千古

春秋上丁

清酒旣載

其香始升

亞獻樂奏秩平之章

式禮莫愆

升堂再獻

響協鼗鏞

誠孚罍斝

肅肅雍雍

譽髦斯士

禮陶樂淑

相觀而善

終獻樂奏敘平之章

自古在昔

先民有作

皮弁祭菜

於論思樂

惟天牖民

惟聖時若

彝倫攸敘

至今木鐸

徹饌樂奏懿平之章

先師有言

祭則受福

四海饗宮

疇敢不肅

禮成告徹

毋疏毋瀆

樂所由生

中原有菽

送

神樂奏平之章

鳧繹戔戔 洙水洋洋 景行行止 流澤無疆

聿昭祀事 祀事孔明 化我烝民 育我膠庠

崇聖祠上丁日子夜先祭教官行禮

名宦祠附祀於廟祭畢分祭

鄉賢祠附祀於廟祭畢分祭

忠義孝悌祠附祀於廟祭畢分祭

節孝祠附祀於廟祭畢分祭

文昌廟每歲春秋擇日及二月三日誕辰知縣致祭

按文昌自前明景泰中停祀

國朝亦未載入祀典各府州縣仍於春秋以少牢致祭

嘉慶六年太常寺奏准奉

旨特加太牢以二月初三日聖誕爲春祭秋祭另行擇日
禮儀祭品與關帝廟同後殿供奉品物禮
儀與祭關帝三代同咸豐六年升爲中祀

魁星閣與文昌廟同日祭

以上廟制及建修年月見學校

社稷壇在城外西北隅有古栢八株雍正十年知縣王恪
修圍牆於樹外每歲春秋上戊日知縣致祭

會典載社稷壇東西二丈五尺南北二丈五尺高三
尺俱用營造尺四圍用磚石砌齊壇面用平磚鋪平
四出陛各三級繚以圍牆四門紅油自北門入其石
主長二尺五寸方一尺埋於壇南正中去壇二尺五
寸只露圓尖餘埋土中外有神牌二以木爲之朱漆
青字填寫神號臨祭設於壇上祭畢藏之其雷雨山
川城隍之神共一壇設二神位陳設行禮與社稷壇
同其神牌照先農神牌式樣製造擇近廟宇潔淨處

所收貯其石主之埋於壇者只露圓尖以表著其地
不鐫神號不建房屋各樹其土之所宜木

按文獻通考漢高祖二年命縣爲公社十年令縣常
以春二月及臘祠稷以羊彘光武建武二年使郡縣
置社稷太守令長侍祠牲用羊豕隋開皇初建社稷
以仲春仲秋吉戊祭郡縣並以少牢各祭又明史洪
武元年頒壇制於天下郡邑俱設於本城西北右社
左稷十一年定同壇合祭如京師十四年令三獻皆
以文職長官
武職不與

風雲雷雨山川城隍壇

禮部則例
名神祇壇

在城南關之南雍正十

年知縣王恪修圍牆內栽栢四株牆外栽栢四株又栽白
楊八株於南分兩行爲甬道之蔭每歲春秋上戊日知縣

致祭

按文獻通考秦時雍有風伯雨師廟以歲時奉祀東
漢以丙戌日祀風師於戌地以己丑日祀雨師於丑

地隋於國城東北七里爲風師壇祀以立春後丑又於國城西南八里爲雨師壇祀以立夏後申唐天寶四載升入中祀仍令諸郡各置一壇五載以雷師同壇宋皇祐初定風師壇高三尺周三十三步雨師雷師壇高三尺方一丈九尺致和三年以二壇同壇其祀用栢升煙又明史太祖時從禮臣言增雲師於風師之次合風雲雷雨爲一壇嘉靖時頒之郡國爲壇於南郊北面周禮大宗伯以羣沈祭山林川澤通考漢文時名山大川在諸侯各自奉祀宋元豐三年始建四望壇於四郊以祀嶽鎮海瀆明史洪武二年嶽瀆諸神各祭城南三十年山川城隍合爲一壇春秋專祀頒其制於府州縣會典乾隆二十二年從陝撫陳宏謀請定山川壇與社稷壇同日致祭

先農壇在東關外教場雍正六年三月知縣楊琦建用官

地爲藉田每歲仲春亥日知縣致祭祭畢行耕藉禮

雍正五年部議擇東郊潔淨官地肆畝玖分立爲藉田內立先農壇高三尺一寸寬九寸五分紅牌金字

填寫先農之神壇後酌建正房三間配房二間中奉神牌東存祭器西收米穀配房東辦祭品西農民居住壇外築土爲牆門開南向祭品照社稷壇例前期齋二日祭日各官俱換蟒袍服州縣則印官秉耒佐貳執青箱播種耆老農夫扶犁耕畢望闕謝恩農具赤牛黑箱青每年用過案盛報部

按文獻通考漢舊儀春始東耕於藉田官祠先農後漢正月始耕以乙日祀先農及耕於乙地是月命郡國守皆勸人始耕宋元嘉二十二年立先農壇於中阡西陌南御耕壇於中阡西陌北以一太牢祀先農班下郡國悉備其禮唐垂拱中改藉田壇爲先農壇宋元豐二年詔於京城東南度田千畝爲藉田徙先農壇於其中又明史洪武二年建先農壇於南郊在藉田北祀儀於社稷同祀畢行耕藉禮

厲壇在北城外石堤北每歲清明日七月十五日十月朔

日知縣致祭

按月令鄭注季春之儺儺陰氣也此月之中日行歷昂昂有大陵積尸之氣氣佚則厲鬼隨而出行仲夏

之儼儼陽氣也此月宿值昴畢亦有大陵積尸之氣
氣伏則厲亦隨而出行季冬之儼儼陰氣也此月之
中日行厯虛危有墳墓四司之氣爲厲鬼將隨強陰
出害人也蓋厲祭聚無祀之鬼而合享之也又魏文
帝時有司奏春分祀厲殃詔以不在祀典除之明初
始立泰厲壇又定郡厲縣厲鄉厲之祀今制設城隍
位於壇上設無祀鬼神位於壇
之左右各豕一羊一拜如常禮

常雩在南郊神祇壇將事每歲立夏後蠲吉知縣致祭

乾隆七年奉文各府州縣不另設壇就風雲雷雨壇
致祭合祀社稷先農之神孟夏諏日行禮迎各神牌
安設壇內不用瘞用燎鑪爲每歲常行之禮風雲雷
雨神居中社神居左稷神居右山川神次左先農神
次右用少牢陳設禮
儀與春秋壇祭同

帝堯廟在縣治西儒學之東明嘉靖時知縣戚賢建每歲

春秋擇期知縣致祭

明劉乾祭帝堯樂辭四章

其一曰於邈帝堯厥德一天八荒含仁毋所虞臻根
甲根茲滋清壤元福我遺黎糜壽豐年其二曰日出
而作日入而息鑿井而飲耕田而食帝力何有是爲
萬化之母其三曰我夕我性以薦我誠鼎燧陽燧玉
盥陰精六瑚在堂八佾在庭神其來寧是卽土簋土
簋土劔其四曰乃立清廟清廟肅肅乃備禮容禮容
穆穆綿綿遐緒其思翼翼爰有庭草萬古一綠草木
之心民
心之煦

關帝廟原在南關外明崇正十一年徙東關外教場屢經
修葺每歲春秋擇期并五月十三日卽縣致祭

雍正三年

勅封關帝三代俱爲公爵曾祖曰光照公祖曰昌裕公父
曰成忠公通行各省府州縣擇一廟之大者置
主後殿每歲春秋致祭咸豐五年升爲中祀
按陸清獻靈壽志關帝廟稱關公其言曰關公正直
之人沒爲明神祀之可也然今之尊關公者皆因道

家之說往往多誣
知禮者其辨之

史誠儀重修闕帝廟碑
余承乏茲土下車謁

闕帝

君廟乃在城東演武場中棟宇橈折垣墉圯廢春秋
二祀無以肅觀瞻而降典禮且地勢低窪當夏秋山
水陡發廟基正當其衝蓋由城北石壩塌損不能捍
衛上雨旁風歲久漸圯考自邑侯王君重修又百餘
年矣夫以沙磧甌脫之地肇造者必有取爾志乘闕
如耆老亦莫能言其故思卜爽塏遷之未逮也已未
春韓生繼善請捐千金爲新廟貲生本富室而英年
好義更可嘉也爰聚紳士謀於察院舊址乃改建者
半議仍者亦半附廟諸村又合詞以爲建廟以來邨
無災祲疹癘請新其舊嗚乎

帝之靈顯護

國佑民固無往而不在也不徒一城一邑而一城一邑
中又豈端在數邨哉然數村之人敬之信之人心之
盼嚮卽

帝靈

爽所式憑真有不可移易者譬之鑿井得泉不益信
歟於是鳩工庀材因舊而重修之殿宇樑楹悉如舊

制閔明年四月廟成先時亢旱落成之日大雨滂沱
一晝夜慶霑之焉固屬天心人愛而

帝靈之陟降後先不爽宜斯廟之及時而成也惟是添建
石壩三十餘丈以護廟基費已及廟之半城北大壩
竟弗克補築終非久遠之計保障之謂何又安得好
義如韓生踵事修築不惟斯廟益資鞏固而附廟諸
村皆可永無水患矣故附及之以志吾愧而思後來
者所用木石磚坯之屬及襄事之賢勞者俱載碑陰
是爲記嘉慶
五年四月

文昌祠在縣署東北邑人劉儋建

城隍廟在縣署西明天順八年知縣張杰重修宏治四年
增建廊廡後殿正德八年邑人王佐重修隆慶五年知縣
鄒慎增建川堂鐘鼓樓萬厯九年重修甬路

國朝康熙十四年重修雍正十二年知縣王恪重添儀仗

嘉慶二十一年重修同治十年重修殿宇廊門鐘鼓樓戲

樓每歲春秋與社稷壇同日祭

按易泰卦城復于隍此以地言也若以神言則始見吳赤烏二年蕪湖廟碑史載高齊慕容儼梁武陵王皆祀之至李唐時城隍祀事愈著故張說李德裕李商隱皆有祀神立廟之舉明初合風雲雷雨山川城隍同壇致祭加以封爵嘉靖時謂城隍人鬼也改祭本廟世俗演其義遂欲以人質之如說部所載抑誣矣

國朝去封爵以神祀之乾隆二十二年議與社稷壇同日致祭清明中元十月朔並主厲壇

明田鄉重修城隍廟碑

粵自王公設險以守國於是有城池之制則必城隍之神以宰一邑之幽者也運神功於冥漠常則奠厥民庶阜厥民食以裕國之元氣焉變則禦侮捍患衛我民生以壯國之神氣焉且權禍福於無私謙者必益之盈者必害之俾奸宄畏神明之洞察於冥冥之

中而罔敢以自肆其惡者何莫而非神之威感通於其間也神祠位宅乾隅但歷年頗多殿宇踈漏我邑侯崔泉鄒公甫新唐政初謁祠下慨然有更新之意焉乃捐俸資以爲首倡然上有好者下必有甚焉時有唐之鄉約善人楊宗義游世威等相體公意各施貲財鳩材會集於數月之間一邑之貧富者各量其施與由是於正殿則易其摧朽於寢宮則大其樑棟而復構以川堂數間又設鐘鼓樓於殿庭階下東西兩祠南曰馬殿又其南曰大門坊牌及牆垣堦墜皆煥然聿新以廟貌則森然其巍巍焉殿庭則淵然其深邃焉神像則肅然其端儼焉侍衛則儀然其整飭焉誠爲一方之神宅也由是望者聳其觀禱者獻其誠不惟有以新邑一時之耳目而且能使人齊明盛服以興起其向善之心者可勝言哉嗚呼非鬼神爲德之盛其孰能以至於斯耶仰而思之又非我邑侯之政清民和百廢俱興孰能使茲廟之維新以至於斯耶是工也興於隆慶四年春畢於五年冬唐民思欲垂我公之功於不泯乃相約刻石以載其事也隆慶五年十一月

土地祠在縣署儀門東典史署北舊寅賓館南每歲二月

二日知縣致祭

按禮祀禮運篇命降於社之謂穀地鄭注社土地之主也故先儒謂里社則祭一里之地州社則祭一州之地侯社王社皆然然則土地亦社神之別稱歟史記樂布傳布死燕齊之間皆爲立社號曰樂公社此謂人思慕而祭之於社非謂其爲社神也世俗舛誣必稱人以實之因以演誕辰不經甚矣朱子語類或問社何以有神曰能生物便是神程子嘗言既有社不應復有城隍則是社與城隍土地爲一神矣

八蜡廟在城內東南隅每歲春秋戊日僚屬分祭

按杜氏通典禘之義自伊耆之代而有其禮所禘之神有八一日先穡二曰司穡三曰農四曰郵表畷五曰貓虎六曰防七曰水墉八曰昆蟲索鬼神而致百物貞觀十一年房元齡等議季冬寅日禘祭百神於南郊大明用犢二神農伊祁氏用少牢開元中制儀季冬臘日禘百神於南郊之壇若其方不登則闕之

注禘字亦從虫昔今取祭義故從示又禮郊特牲孔疏大蜡八者會聚萬物而索饗但以八神爲主是也唐縣舊有廟祀春秋報賽以祈神佑也

劉猛將軍廟附祀八蜡廟

按降靈錄神名承忠吳川人元末授指揮弱冠臨戎兵不血刃盜皆鼠竄適千里飛蝗遍野揮劍追逐須臾蝗飛境外後因鼎革自沈於河有司奏請遂授猛將軍之號世遂以其神主蝗祀之

馬神廟在八蜡廟東順治十七年知縣李起鳳重修後移建驛北每歲六月二十三日知縣致祭

按周官馬神之祭有四春祀馬祖天駟星也夏祭先牧始養馬者秋祭馬社始乘馬者冬祭馬步乃神之災害馬者隋以四仲月祭唐宋因之明初定以春秋二仲月用甲戌庚日祭

蕭曹廟在縣署儀門外每歲春秋典史率書吏致祭